



ORDENANZA FISCAL REGULADORA DA TAXA POLA PRESTACIÓN DE SERVIZOS MUNICIPAIS ASOCIADOS Á CELEBRACIÓN DE MATRIMONIOS CIVÍS

Artigo 1.- Natureza e fundamento legal.

O Concello de Marín establece a taxa pola prestación de servizos asociados á celebración de matrimonio civil e aproba a correspondente ordenanza fiscal no exercicio da potestade regulamentaria e tributaria recoñecida ás Administracións Públicas de carácter territorial, de conformidade co previsto nos artigos 133.2 e 142 da Constitución Española, nos artigos 4.1.a) e b) e 106 da Lei 7/1985, de 2 de abril, Reguladora das bases de Réxime Local, nos artigos 15 a 27 e 57 do Real Decreto Lexislativo 2/2004, de 5 de marzo, polo que se aproba o Texto Refundido da Lei Reguladora das Facendas Locais, e na disposición adicional cuarta da Lei 58/2003, de 17 de decembro, Xeral Tributaria.

Artigo 2.- Feito Impoñible.

Constitúe o feito impoñible da taxa a actividade administrativa iniciada e desenvolvida con motivo da prestación dos servizos asociados á celebración de matrimonios civís ante a Alcaldía-Presidencia, ou Concelleiro/a en quen delegue, incluso cando o citado matrimonio non se celebre por causa imputable aos contraentes e suxeitos pasivos da taxa.

Artigo 3.- Suxeito pasivo.

Son suxeitos pasivos da taxa en calidade de contribuíntes as persoas físicas beneficiarias do servizo, entendéndose por tal os contraentes que formulen a solicitude do servizo, que quedan obrigados solidariamente.

Artigo 4.- Devengo.

O tributo devengarase e nace a obriga de contribuír, no momento da presentación da solicitude para concreción do día e hora da celebración do matrimonio.

A presentación da solicitude iniciará a actuación administrativa e esta non se realizará sen que sexa efectuado o pago correspondente en réxime de autoliquidación na Tesourería municipal ou nas entidades bancarias debidamente autorizadas.

Artigo 5.- Obrigados ao pago.

Están obrigados ao pago da taxa regulada nesta ordenanza os beneficiarios do servizo, entendéndose por tales os contraentes.



Artigo 6.- Contía.

1.- A contía da taxa que regula a presente ordenanza fiscal será de 55,00 € por expediente e celebración. Dita celebración efectuarase no Salón de Plenos do Concello.

Esta tarifa xeral, ponderarase con un coeficiente de 1,5 para as celebracións en ubicacións diferentes dentro do termo municipal.

2.- Serán de conta dos contribuíntes os gastos de ornamentación e demais propios da celebración, e reparación das dependencias empregadas en caso de deterioro.

Artigo 7.- Exencións e bonificacións.

Non se aplicará ningunha exención, bonificación nin redución para a determinación da débeda tributaria que os suxeitos pasivos deban satisfacer por esta taxa, todo elo de conformidade co artigo 9 e a Disposición Adicional Terceira da Lei Reguladora das Facendas Locais.

Artigo 8. Normas de xestión.

1.- A taxa por prestación de servizos contemplados no artigo 2 esixirase en réxime de autoliquidación.

2.- Os suxeitos pasivos están obrigados a practicar a autoliquidación nos impresos habilitados ao efecto pola administración municipal e realizar o seu ingreso, o que se deberá acreditar no momento de presentar a correspondente solicitude para a determinación da data e hora da celebración do matrimonio civil, que non se tramitará sen que se efectuara o pago correspondente.

Artigo 9.- Procedemento de tramitación.

1.- A solicitude da actuación administrativa tendente á celebración do matrimonio civil deberá ir precedida, necesariamente, da instrución e tramitación do expediente correspondente no Rexistro Civil competente.

2.- Os interesados na celebración de matrimonio civil deberán presentar a seguinte documentación:

- a) Solicitude de determinación de día e hora da cerimonia.
- b) Fotocopia do DNI dos contraentes e de dous testigos maiores de idade.
- c) Auto do xuíz de primeira instancia ou Xulgado, autorizando o matrimonio civil no Concello de Marín.
- d) Resgardo xustificativo do pago da taxa mediante autoliquidación.

3.- As solicitudes se presentarán no Rexistro de entrada de documentos acompañada da carta de pago xustificativa do depósito previo da taxa e serán atendidas por rigoroso orde cronolóxico de entrada das mesmas para o sinalamento da data e hora de celebración.



Concello de Marín Ayuntamiento de Marín

No caso de solicitudes coincidentes en data, resolverase por Resolución da Alcaldía ou Concellería delegada, unha vez efectuada proposta de outra data para a súa aceptación polos solicitantes que presentaran a súa instancia con posterioridade e se lle asignara un número de entrada maior.

4.- A autorización do matrimonio civil corresponderá ao Sr/a Alcalde/sa-Presidente/a ou ao Concelleiro/a da corporación en quen delegue.

Artigo 10.- Devolución da taxa.

1.- Os suxeitos pasivos terán dereito á devolución da taxa cando o matrimonio non se puidera celebrar por causa imputable a este Concello. Entenderase causa imputable ao Concello a orixinada exclusivamente por vontade municipal que non veña motivada, promovida, ocasionada ou provocada por actuacións, feitos, obras, conductas ou comportamentos dos interesados.

2.- Non obstante, os suxeitos pasivos terán dereito á devolución do 50 por cento do importe da taxa cando a cerimonia do matrimonio civil non puidera celebrarse por causa imputable aos mesmos, sempre que se comunique ao Concello, con unha antelación mínima de 48 horas ao día fixado para a celebración do matrimonio, por calquera medio que permita ter constancia da súa recepción polo Concello.

Artigo 11.- Infraccións e sancións tributarias.

En todo o relativo á cualificación de infraccións tributarias e sancións estarase ao disposto na Lei Xeral Tributaria e demais normativa de desenvolvemento.

Artigo 12.- Normas complementarias.

No non previsto especificamente nesta ordenanza e que faga referencia á aplicación, xestión, liquidación, inspección e recadación destas taxas, estarase ao previsto na Lei Xeral Tributaria, así como nas disposicións ditadas para o seu desenvolvemento e demais lexislación vixente que lle sexa de aplicación, en especial a Ordenanza xeral de Tesourería e recadación dos tributos e outros ingresos de dereito público.

Disposición Final.

A presente ordenanza fiscal entrará en vigor, unha vez aprobada definitivamente polo Pleno da Corporación, ao día seguinte á súa publicación no Boletín Oficial da Provincia, e comezará a aplicarse a partir do día seguinte ao da súa publicación no Boletín, permanecendo en vigor ata a súa modificación ou derogación expresa.